

Re ruca'n carta re xutz'ibaj can re apóstol San Pedro

Re nabey tak tzij chin re carta re'

¹ Yen Simón Pedro, jun rusamajel re Jesucristo, y chuka' yin jun ru-apóstol reja'. Tic'ulu' c'a re carta re' re can ivichin-va yex ntz'iban-a, roma can junan kaniman[☆] y kayi'on kánma cha re Jesucristo. Quire' kabanon roma re Dios xuban cha re Jesucristo re manak rumac, y xcom koma yoj re yoj aj-maqui' chin yojrucol chach re kamac.

² Can-ta q'uiy utzil[☆] xtic'ul chiyixnojel riq'uin re Dios y re Kajaf Jesucristo. Y chuka' re ivánma can-ta otz nuna' roma itaman rach re Dios y re Kajaf Jesús.

Re quic'aslen re quiniman chic re Jesucristo

³ Y ja re poder re c'o riq'uin re Dios jare' re ya'yom-pa chaka ronojel re nic'atzin chin nijalataj re kac'aslen.[☆] Y chin chuka' nakac'uaj jun c'aslen otz chach reja', ruyi'om-pa re nic'atzin chaka, roma kataman chic rach re xvayon kachin. Y reja' xojrayoj riq'uin re namalaj ruk'ij y riq'uin re ru-poder. ⁴ Reja' xusuj ronojel re' chaka, y re' camas nem y camas rajkalen. Roma yojcolotaj-pa chach re itzel tak rayibal re jec'o vova' chach re ruch'ulef, roma chire' nipo-va re etzelal. Reja' can nujal re kac'aslen[☆] chin yojoc ancha'l reja'. ⁵ Mare' tak yex re iniman[☆] chic re Jesucristo, otz che nik'alajin re ru-poder re Dios pan ic'aslen. Y tak xk'alajin-yan re ru-poder re Dios pan ic'aslen, otz che nitamaj[☆] más chij re je'tz'iban can chupan re ruch'abal

☆ 1:1 Hch 11.17; Ef 4.5. ☆ 1:2 1 P 1.2. ☆ 1:3 Jn 17.3. ☆ 1:4 2 Co 3.18. ☆ 1:5 1 P 3.7. ☆ 1:5 2 P 3.18.

re Dios. ⁶ Y tak itaman chic re tz'iban can chupan re ruch'abal re Dios, nic'atzin chuka' che man tiya' k'ij cha re mac.✠ Y tak xixtiquir-yan che man niya-ta k'ij cha re mac, can ruc'amon che yixcoch'on.✠ Y tak xixcoch'on-yan, can ruc'amon che nic'uaj jun c'aslen ancha'l nrajo' re Dios.✠ ⁷ Y tak ic'uau chic re c'aslen ancha'l nrajo' re Dios, ruc'amon chuka' che ye'jo' re hermanos. Y tak ye'jo' chic re hermanos, otz chuka' che ye'jo'✠ conojel vinak.

⁸ Y vo xa yex c'o ronojel re' iviq'uin, can nitamaj más rach re Kajaf Jesucristo. Y re ic'aslen xtivachin y c'o rajkalen. ⁹ Pero vo xa c'o jun manak ronojel re otz tak bannabal re' riq'uin, rumistan chic che reja' je'ch'ajon✠ chica re rumac. Xa ndoc jun vinak ancha'l moy, o ndoc jun vinak re man can-ta naj nitzu'un. ¹⁰ Y mare', hermanos re xixvayox✠ y xixcha' roma re Dios, can titija' ik'ij che quixc'ue' riq'uin reja'. Y can nojel tiempo tibana' ronojel re', chin quire' man yixtzak-ta. ¹¹ Vo xa quire' niban, can xquixc'ul chila' chicaj riq'uin re Kajaf Jesucristo re nicola kachin chach re kamac, y ja reja' re nibano gobernar✠ chin ronojel tiempo.

¹² Mare' yen man jun bey xquintane-ta chubixic chiva, astapa' yex can itaman y chuka' can ibanon-va confiar-ivi'✠ riq'uin re katzij ch'abal c'o iviq'uin. ¹³ Chinoch yen, camas ruc'amon che yiximpaxabaj can, roma c'a c'o ca'e-oxe' k'ij nuc'aslen. ¹⁴ Y yen can ntaman chic che xaxe chic ca'e-oxe' k'ij nuc'aslen c'o,✠ roma quire' sekresan✠ chinoch roma re Kajaf Jesucristo. ¹⁵ Pero yen can nintaj nuk'ij chin nimban can re jun carta re', chin quire' astapa'

✠ 1:6 Hch 24.25. ✠ 1:6 Stg 1.3. ✠ 1:6 2 P 3.11. ✠ 1:7 1 Jn 4.21.
 ✠ 1:9 He 9.14; 1 Jn 2.9. ✠ 1:10 He 3.1. ✠ 1:11 2 Ti 4.8. ✠ 1:12 1 P 5.12; 2 P 3.17. ✠ 1:14 Dt 4.21, 22; 31.14; 1 R 2.2, 3. ✠ 1:14 Hch 20.23.

yin quiminak chic, yex can xte'ka chi'c'o'x ronojel re je'mbin can chiva chupan re jun carta re'.

Re xe'tz'eto re ru-poder re Jesucristo

¹⁶ Tak yoj xkatzijoj chiva che re Kajaf Jesucristo c'o ru-poder, man xkatz'uc-ta-ka. Y chuka' xkabij chiva che re Jesucristo xtipa chic jun bey, re' man je'katz'ucun-ta-ka. Roma yen y re nic'aj chic vichibil, can xkatz'at che re Jesucristo camas nem y camas ru-poder. ¹⁷ Y xkatz'at tak xya' ruk'ij roma re Dios, re Rutota'. Y xkac'axaj chuka' re xbex cha roma re namalaj Dios re c'o ruk'ij, re Dios xubij: Jare' re Nuc'ajol, y yen camas ninjo' ¹⁸ y yinqui'cot riq'uin, xcha'. ¹⁸ Yoj can man je'katz'ucun-ta-ka re xkabila' chiva. Xa can xkatz'at-va ronojel. Can xkac'axaj ¹⁹ tak re Dios xch'o-pa chila' chicaj, xkac'axaj tak xojc'ue' riq'uin re Jesucristo chire' pa rue' re lok'olaj loma.

¹⁹ Y re' más nuban chaka che can katzij-va re tz'iban can chupan re ruch'abal re Dios, y nubij che can q'uiy cosas re xque'banataj. Y camas ruc'amon che nakaya' pa cuenta re ruch'abal re Dios, roma chach re ruch'ulef c'o jun k'oko'm. Pero re ruch'abal re Dios can ancha'l jun k'ak' re nisekresan. ²⁰ Y can takaya' pa cuenta re ruch'abal re Dios. Roma xte'ka re k'ij che re jun ancha'l nema-ch'umil ndoc pa tak kánma, y can nusekresaj chuka' re kánma. ²⁰ Y yex tiene que nitamaj nabey che man jun vinak nitiquir nibin ²¹ andex nubij re ruch'abal re Dios, vo xa mana-ta re Espíritu Santo nita'o richin. Roma chupan re ch'abal re' je'tz'iban-va can re xque'banataj. ²¹ Y can jac'a re Espíritu Santo re xbin ²² chique re rusamajela' re Dios re xe'cue' ajuer can, tak xquibij re xque'banataj. Reje'

☆ 1:16 Mr 9.2; Lc 9.28. ☆ 1:17 Mt 3.17; 17.5; Mr 1.11; 9.7; Lc 3.22; 9.35.

☆ 1:18 Ex 3.5; Jos 5.15. ☆ 1:19 2 Co 4.4. ☆ 1:20 Ro 12.6. ☆ 1:21 2

Ti 3.16.

can je'cha'on roma re Dios y man quion-ta reje' xe'tz'ucuka re xquibij.

2

Re vinak re mana-ta re niquic'ut

¹ Re ajuer can, jec'o achi'a' xe'c'ue' chiquicojol re nuvinak israelitas re nibex profetas chique, xquibij che je'takom-pa roma re Dios chin niquitizoj re ruch'abal re Dios, pero man quire-ta. Y quire' chuka' chi'icojol yex vocame. Jec'o vinak xque'bec'ulum-pa,[☆] y xtiquibij che ja re ruch'abal re Dios niquic'ut, y xa man katzij-ta. Roma xa quina'oj reje' re ye'quibila' y man jun nenaben tak ye'quibila-apo chi'icojol. Y re vinak re' hasta man xtiquinimaj-ta che re Ajaf xcom chin xutoj quimac. Xa ja reje' mismo re ye'yi'o tijoj-pokonal pa quive'. Man xtiquinabej-ta tak xtipa pa quive'. C'aja tak xtiquina' xa pa k'ak' chic jec'o-va. Y chuka' re ye'tzekelben quichin c'a chire' xque'beka-va. ² Y je q'uiy re xque'tzekelben quichin roma re c'aslen quic'uan, astapa' re jun c'aslen re' xa man utzulaj c'aslen-ta. Y mare' quitzij reje' tak xtiyok'[☆] re katzij bey y re utzulaj ch'abal richin re Dios, roma jec'o-apo iviq'uin. ³ Y re vinak re' roma camas niquirayij re mero, xtiquibij che can chin-va re Dios re enseñanza niquiya', y man quire-ta. Xaxe chin niquilisaj mero chi'ik'a'.[☆] Y re vinak ye'bano quire' can xque'q'uis, roma can ajuer rubin can re Dios che xtuya' castigo pa quive'. Y re castigo re' can xtipo-va chiquij.

⁴ Roma re Dios, pero ni xe-ta re ángeles[☆] man xe'rucuy-ta tak xe'macun. Xa xe'ruch'akij chupan re lugar chin tijoj-pokonal. Xe'ruch'akij chupan re lugar chin

[☆] 2:1 Dt 13.1; Mt 24.11. [☆] 2:2 Hch 19.9. [☆] 2:3 1 Ti 6.5; Tit 1.11.

[☆] 2:4 Job 4.18; Jud 6.

k'oko'm.✠ Chire' je'yi'on-va, quiyaben re k'ij tak xtiban juzgar pa quive'. ⁵ Y chuka' re Dios man xe'rucuy-ta chic re vinak re xe'macun ajuer can. Xa xuban che xpa jun job pa quive' re can manak tz'etal-va, re nibex diluvio cha. Roma re quic'aslen re vinak re' man choj-ta chach re Dios. Pero xe'rucol re Noé✠ y je vuku' chic vinak más. Y ja re Noé re xsekresan chique re vinak re andex rubanic nic'uax jun c'aslen choj chach re Dios. ⁶ Y re Dios can man xucuy-ta chic chuka' quimac re jec'o pa tenemit Sodoma y Gomorra. Xa xubij che que'q'uis, y can quire-va xbanataj. Reja' xe'ruq'uis re tenemit re' riq'uin k'ak',✠ y can xe chic quichajil xc'ue' can. Chin quire' tiquitamaj re vinak re ye'c'ue' can, che vo xa man choj-ta quic'aslen xtiq'ic'uaj chach re Dios, xtika chuka' jun namalaj castigo pa quive' reje'. ⁷ Re Dios can xe'ruq'uis-va re ca'e' tenemit xquibini'aj Sodoma y Gomorra. Pero xucol-pa✠ chach re castigo re' re jun ache choj ruc'aslen re xubini'aj Lot. Re Lot can ju-va xuna' ránma roma xe'rutz'at re nic'aj chic vinak che xquic'uaj jun itzel c'aslen. ⁸ Y re jun ache choj ruc'aslen re' xc'ue' chiquicojol re vinak re'. Y roma k'ij-k'ij xuc'axaj y xutz'at re etzelal xe'quibanala' re vinak, reja' camas xk'axo✠ re ránma roma re'. ⁹ Re Ajaf can rutaman ye'rucol re je'ac'ayon jun c'aslen ancha'l nrajo' reja'. Tak can jec'o pa jun tijoj-pokonal chin ye'tojtobex, reja' ye'rucol.✠ Jac'a re vinak re man quic'uan-ta jun c'aslen choj, re Ajaf xa c'aja tak xtapon re k'ij jare' tak xtuban juzgar pa quive'.

¹⁰ Y re' can nuc'ut-va che re vinak ye'bano itzel tak rayibal✠ re nika chiquivach reje', xa can c'aja tak xtapon re k'ij jare' tak xtiban juzgar pa quive' roma re Dios, roma

✠ 2:4 Ap 20.2, 3. ✠ 2:5 Gn 7.1. ✠ 2:6 Gn 19.24. ✠ 2:7 Gn 19.16.

✠ 2:8 Sal 119.53, 136, 158. ✠ 2:9 Sal 34.17; 1 Co 10.13. ✠ 2:10 2 P 3.3.

xabanchique autoridades ye'quitzelaj. Man ye'q'uex-ta y chuka' man niqixibij-ta-qui' chin niquiban xabanchique cosa. Reje' can man jun quik'ij chuka' niquiban chique conojel vinak. Man niqixibij-ta-qui' chin niquibij itzel tak tzij chiquij re camas quik'ij. ¹¹ Jac'a re ángeles astapa' camas qui-poder y q'uiy cosas ye'tiquir niquiban, pero man jun bey niquic'utuj-ta jun castigo cha re Dios[☆] chiquij re c'o itzel tak banabal ye'quiban Reje' ne'quibij cha re Ajaf re andex ye'quibanala', pero man niquicusaj-ta itzel tak tzij tak ne'quibij cha re Ajaf.

¹² Pero re vinak re man niqixibij-ta-qui' ye'ch'o chiquij re camas quik'ij, can ancha'l je chicop[☆] roma man niquinojij-ta ba'. Y astapa' jun cosa re man jun bey k'axnak pa quive', itzel ye'ch'o chij. Y riq'uin re itzel tak banabal quire', niquivayoj castigo pa quive' y c'a chupan re castigo re' xque'beka-va. Ancha'l niquic'alvachij re chicop tak ye'betz'am-pa chin ye'quimisas.[☆] Y yoj nakabij che otz rubanic chique. ¹³ Y re vinak re' xtiquic'ul rajal[☆] re quibanabal. Jac'a vinak re' re ye'bano che can che pak'ij che chak'a' jec'o chupan re etzelal, y can jabal niquina' tak niquiban quire'. Re vinak re' can je ancha'l tz'il re c'o chij jun tziak, y can je yi'oy q'uex. Y can iviq'uin chuka' xtiquimol-va-qui' y xque'va' iviq'uin, xaxe chin yixquik'ol. Y jabal niquina' tak quire' niquiban.

¹⁴ Y xabanchique ixok niqitz'at, can jare' niquijo' ye'c'ue' riq'uin. Man ye'tiquir-ta niquiya' can rubanic re mac. Niquiban chuka' chique re can c'amaje-na kas tiquiban confiar-qui' riq'uin re Dios che ye'macun. Jabal quitaman ronojel rach k'aløj, chin niquimol q'uiy mero. Reje' can xtika-va re castigo pa quive'. ¹⁵ Y can quiyi'on

☆ 2:11 Jud 9. ☆ 2:12 Jud 10. ☆ 2:12 Jer 12.3. ☆ 2:13 Is 3.11; Ro 2.8, 9; Fil 3.19; 2 Ti 4.14.

chic can re c'aslen choj. Can je'satzanak-va. Y can quic'uan re c'aslen re xuc'uaj re jun ache profeta re xc'ue' ajuer can xubini'aj Balaam,[☆] ruc'ajol re ache xubini'aj Beor. Re Balaam can nurayij re mero, astapa' can riq'uin itzel tak banabal nuch'ac-va. ¹⁶ Y roma re etzelal nrajo' nuban re Balaam, xbex cha che man otz-ta re nunojij. Y can ja re ruquiej re xch'o-pa cha.[☆] Y astapa' jun quiej man nitiquir-ta nich'o, re ruquiej re Balaam xch'o-pa cha ancha'l nich'o jun vinak, chin che man chic xuya-ta k'ij cha che no'rbana' re itzel tak banabal re runojin che nuban.

¹⁷ Y re vinak re je'satzanak, can je ancha'l alaxbal-ya' re je chake'j chic. Chuka' can je ancha'l nube[☆] re je'ruc'amom-pa cak'ik'. Re vinak re' can je'yaben-va roma re lugar can xak y camas k'oko'm[☆] chin tijoj-pokonal. Y chin nojel tiempo xque'ba chire'. ¹⁸ Y can niqubananej che c'o q'uuy na'oj quiq'uin, pero rion tzij re man jun quijkalen ye'quibila'. Y chin ye'quik'ol re xa c'a ba' que'colotaj-pa chiquicojol re je'ac'ayon itzel tak c'aslen,[☆] niqubila' chique che otz ye'quibanala' re itzel tak rayibal. ¹⁹ Niquisujla' chique che vo xa ye'quitzekelbej, can ye'oc-va libre,[☆] pero ni xe-ta reje' mismo man je libre-ta. Roma astapa' niquisuj chique re nic'aj chic che ye'oc libre, reje' xa man je libre-ta, roma xa je'kejnak pa ruk'a' re etzelal.[☆] Y kataman jabol che re je'ch'acatajnak xa can je'kejnak pa quik'a' re ch'acayon quichin. ²⁰ Y xabanchique vinak rutaman chic rach re Kajaf Jesucristo re nicola kachin chach re kamac, reja' can colotajnak chic chach re etzelal chin re ruch'ulef. Y vo xa nunem chic-ri' jun bey chupan re c'aslen re anche' elinak-va-pa, nika chic jun bey pa ruk'a'

☆ 2:15 Nm 22; Ap 2.14. ☆ 2:16 Nm 22.21, 23, 28. ☆ 2:17 Jud 12.

☆ 2:17 Jud 13. ☆ 2:18 Hch 2.40. ☆ 2:19 Ga 5.13. ☆ 2:19 Jn 8.34; Ro 6.16.

re etzelal. Y mare' re ruc'aslen re vinak re', más c'ayef[☆] xtuban que chach re xuban tak c'amaje-na tunimaj re Jesucristo che'. ²¹ Roma más-ta otz che man-ta jun bey xutamaj re andex rubanic jun c'aslen choj chach re Dios.[☆] Roma xa ye'ruya' chic can re lok'olaj tak mandamientos re xe'ruya' re Dios cha. ²² Y vova' can katzij-va che nibanataj ancha'l nubij jun tzij: Re tz'e' no'rtija' chic-pa re xuxa-yan can.[☆] Y vova' can nibanataj chuka' ancha'l nubij jun chic tzij: Re ak astapa' jabal atinisan chic-a, no'rquicha' chic-pa-ri' jun bey pa ch'abak.

3

Tak xtipa re Ajaf

¹ Jare' re ruca'n carta re nintak-a chiva yex hermanos re camas yixinjo', yex re can nirayij-va niban re nrajo' re Dios. Y chupan re nabey carta can ximban chiva che quixnojin jabal,[☆] y quire' chuka' nimban chiva chupan re ruca'n carta re'. ² Can te'ka chi'c'o'x jabal re quibin can re rusamajela' re Dios re xe'c'ue' ajuer can, re xbex profetas chique. Man timistaj[☆] re quibin can reje' chij re xtibanataj. Y chuka' man que'mistaj re mandamientos re xkac'ut yoj chivach, y re' je'yi'on can pa kak'a' yoj re yoj apóstoles roma re Kajaf re nicola kachin chach re kamac.

³ Y re nabey ninjo' ninataj chiva vocame ja re nich'o chiquij re vinak re xque'pa chupan re ruq'uisibal tak k'ij, re xa can xe re niquirayij reje' re niquiban.[☆] Vinak re xa can xtiquitz'abej re nubij re ruch'abal re Dios. ⁴ Re vinak re' xtiquibila': Vo xa can rubin can re Jesucristo che nipa, ¿anche' c'a c'o-va jun señal che can nipo-va?[☆]

☆ 2:20 Mt 12.45; Lc 11.26; He 10.26, 27. ☆ 2:21 Lc 12.47; Jn 9.41. ☆ 2:22

Pr 26.11. ☆ 3:1 2 P 1.13-15. ☆ 3:2 Jud 17. ☆ 3:3 1 Ti 4.1; 2 P 2.10.

☆ 3:4 Is 5.19; Jer 17.15; Ez 12.22.

Roma desde que tak je quiminak-a re kate-karta' can man jun cosa re jalatajnak-ta chach re ruch'ulef. Can ancha'l tak xban re ruch'ulef, can c'a quire' rubanon vocame, xque'cha'. ⁵ Re vinak re' can niquiban ancha'l xa man quitaman-ta re xuban re Dios ajuer can. Nabey re Dios can xubij-va che tic'ue' re rocaj, ✧ y xubij chuka' che tik'alajim-pa re ruch'ulef ✧ pa ya'. Y re' can nuc'ut-va chakavach che re ruch'ulef pa ya' c'o-va. ⁶ Pero jun k'ij re ya' re' xq'uiy roma re jun namalaj job xuban re nibex diluvio cha, y re vinak re jec'o chach re ruch'ulef re man xquinimaj-ta re Dios, xe'q'uis roma re ya'. ✧ ⁷ Y re Dios can rubin che re ruch'ulef y re rocaj re ye'katz'at vocame, can xque'q'uis chupan re k'ij tak re Dios xtubij che tika re k'ak' pa quive'. ✧ Y re' jec'o can chin re k'ij tak reja' xtuban juzgar pa quive' re vinak re man otz-ta quic'aslen chach reja'.

⁸ Pero yex hermanos re camas yixinjo', nimbij chiva che man timistaj che riq'uin re Dios, jun k'ij ancha'l jun mil juna' y jun mil juna' ancha'l jun k'ij. ✧ ⁹ Re Ajaf xa nipayan. Y man rumistan-ta, ancha'l niquinojij re nic'aj chic vinak, che camas q'uiy tiempo tibo-va y manak rutzijol che nipa, man quire-ta. Reja' camas nicoch'on ránma kaq'uin, y man nrajo-ta che c'o-ta jun nicom chupan re rumac. ✧ Y mare' can c'a ruyi'on k'ij chaka chin nitzolaj-pa kánma riq'uin re Dios.

¹⁰ Y re Ajaf can xtipo-va chupan re k'ij re rubin can. Y ancha'l nuban jun elek'om tak ndoc pa jun jay, ✧ man jun atamayon jampa' ne'ka. Can quire' chuka' tak xtipa re k'ij chin re Ajaf. Y re rocaj can xtijulu y can xtipok'olaj

✧ 3:5 Sal 33.6. ✧ 3:5 Gn 1.6; He 11.3. ✧ 3:6 Gn 7.11, 21-23; 2 P 2.5.

✧ 3:7 Mt 25.41; 2 Ts 1.8; He 1.11. ✧ 3:8 Sal 90.4. ✧ 3:9 Ez 18.23; Hab

2.3; Ro 2.4; He 10.37. ✧ 3:10 Mt 24.43.

tak xtiq'uis. Re je'cusan chin je'banalon ronojel cosas can xque'jeno pa k'ak' y xque'q'uis. Re ruch'ulef re' y ronojel re jec'o chach, xque'c'at[☆] chuka'.

¹¹ Can xtiparox ronojel re', y mare' yex camas nic'atzin che nic'uaj jun c'aslen ch'ajch'oj,[☆] jun c'aslen re nika chach re Dios. ¹² Can-ta niyabej-apo re k'ij chin re Dios, y can-ta nirayij che napon-yan-ta re k'ij re'. Tak re rocaj xtijulu pa k'ak' y xtiq'uis.[☆] Y re je'cusan chin je'banalon ronojel cosas, can xque'yi'ar[☆] pa rurep re k'ak'. ¹³ Jac'a yoj re kaniman re Jesucristo, ja re c'ac'a rocaj y re c'ac'a ruch'ulef re kayaben,[☆] roma jare' re rusujun can re Dios. Y chire' man jun etzelal c'o y ronojel otz.

¹⁴ Mare' hermanos re iyaben ronojel re', can titija' ik'ij che manak-ta tz'il c'o pa tak ivánma, y chuka' manak-ta imac yixe'ruvila-ka re Ajaf.[☆] Y chuka' re ivánma can-ta otz nuna' roma iniman chic reja'. ¹⁵ Y te'ka chi'c'o'x che re Kajaf c'amaje-na tipa, roma reja' camas nicoch'on ránma[☆] kaq'uin y mare' ruyi'on k'ij chique conojel che ye'colotaj-ta chach re quimac. Y can quire' chuka' rutz'iban-a re hermano Pablo chiva, can ancha'l re na'oj xuya' re Dios cha reja' y yoj camas nakajo' re Pablo. ¹⁶ Y chupan ronojel re ru-cartas reja' c'o tzij quire' ye'rubij y c'ayef chin che ye'k'ax pa kave'. Y mare' jec'o vinak re mana-ta rubixic niquiban, roma ja quire' niquijo' niquiban. Reje' manak can-ta na'oj quiq'uin y chuka' man can-ta quibanon confiar-qui' riq'uin re Dios. Y mare' re Dios can xtuya' re castigo pa quive', roma can quire' chuka' niquiban riq'uin re nic'aj chic tzij re jec'o chupan re ruch'abal re Dios re tz'iban can.

☆ 3:10 Ap 20.11. ☆ 3:11 1 P 1.15. ☆ 3:12 Sal 50.3. ☆ 3:12 Mi 1.4.

☆ 3:13 Is 65.17. ☆ 3:14 Fil 1.10. ☆ 3:15 Ro 2.4; 1 Ti 1.16; 1 P 3.20.

¹⁷ Mare' nimbij chiva yex hermanos re camas yixinjo': Can tichajij re ic'aslen roma itaman chic che xque'pa vinak re xque'k'olo ivichin. Can tichajij[☆] re ic'aslen chin man quixk'olotaj pa quik'a' re vinak re quic'uan jun itzel c'aslen. Chin quire' yex re can ibanon confiar-ivi' riq'uin re Dios man xque'tiquir-ta chivij. ¹⁸ Pa ruq'uixel che xque'tiquir-ta chivij, xa can titamaj más chij re Kajaf Jesucristo re nicola kachin chach re kamac. Y can-ta xtiq'uiy[☆] más pa tak kánma re utzil re kac'ulun riq'uin reja'. Y reja' xtuc'ul-ta ruk'ij[☆] vocame y nojel tiempo. Amén.

[☆] 3:17 Mt 7.15; 16.6, 11; Fil 3.2; Col 2.8; 2 Ti 4.15. [☆] 3:18 Ef 4.15; 1 P 2.2.

[☆] 3:18 Ro 11.36.

Re C'ac'a Testamento pa Kach'abal
New Testament in Kaqchikel, South Western Yepocapa and
Acatenango

copyright © 2012 Wycliffe Bible Translators, Inc.

Language: Kaqchikel

Dialect: Yepocapa - South Western

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaqchikel, South Western

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-03

PDF generated using Haiola and XeLaTeX on 12 Mar 2019 from source files dated 5 Mar 2019

bb306a41-e560-560c-a8a3-c6ce3d11ccfb